

四庫全書

史部

欽定四庫全書

史部

山東通志卷二十八之四

詳校官監察御史_臣劉涓

檢討_臣德生覆勘

總校官知縣_臣繆琪

校對官助教_臣卜維吉

謄錄監生_臣金特

欽定四庫全書

山東通志卷二十八之四

人物四

順治

康熙

雍正

皇清

本朝人物其已登舊志者無庸更為擬議茲從各府
州縣志中採輯原傳而無奈格於

功令非咨部留祀者不書今就遞年咨請各冊撫其事
實而編次之以時為序勿以先後為軒輊也

田玉潤定陶人甫九齡即以孝稱父病十餘年躬侍湯藥衣不解帶歷久如一日順治初土寇圍城兵食不繼玉潤出家粟麥以贍之城守得全又捐資以修文廟黌序為之一新卒後二十年士民公請入鄉賢祠

孔衍鈺聖裔其祖始遷居汶上順治初補博士主聖澤書院整廟貌肅明禋禮服禮器秩然有條幼失怙事母極孝年五十孺慕不少衰鄉黨無不稱之歿

後公為請祀

傳以漸字星巖聊城人順治乙酉舉人丙戌會狀不數年入相謨謀篤斐吐握至誠自以顯榮太驟盛年告歸杜門著書深得老氏之學

王與勅新城人博學多聞少年即得時譽順治初年膺薦貢入成均有司敦迫而與勅以有父年老堅辭不赴惟日課諸子各因其才盡以所學授之長子士祿登乙未進士官考功員外郎次士禧邑庠廩貢次

士祐康熙庚戌進士官中書次士禎順治戊戌進士官刑部尚書簪組之盛萃于一門而與勅視之恬如也嘗編累世家訓以示子孫忠孝勤儉之外不知其他累贈資政大夫祀於鄉

朱昌祚字雲門世居高唐州後遷歷城少穎異年甫十餘歲從軍以北及扈

世祖入關才著中外官宗卿數載

特簡淞江巡撫時浙東西土寇未靖昌祚撫勦悉當機宜

兩浙皆平未幾杭紹台寧等處災荒疊告昌祚疏請賑饑浙民賴以全活者數十萬又清查積逋條晰律例酌定兵餉在任三載旋遷閩督未之任再遷直隸河南山東總督值母喪請終制不允乃以墨經視事剔奸釐弊以疏諫八旂圜地事逆輔臣意輒置之法康熙九年

聖祖惻念其冤

特加追卹官給塋祭謚勤愍蔭一子四品京秩

張鳳翔堂邑人前明萬厯辛丑進士歷官工部尚書
國朝初以謝陞疏薦特起用戶部侍郎奏稱山東瘡夷
初定賦額宜稍寬得減三分之一半計八十三萬東人
感之

朱 纁字武林單縣人前明大名府知府忠烈公廷
煥次子也忠烈盡節時纁甫九齡每以不及事父為
憾終身哀慕不御羅綺事祖父備極恭謹事孀母備
極色養與兄極友愛八十年翁好無間遇邑中大興

作必竭資以襄民力歿之日鄉人有慟至失聲者
房可壯字海容益都人前明萬厯甲辰進士由中書
擢監察御史疏魏忠賢詔獄崇禎初起補南銓晉尚
寶太僕光祿等卿遷副都御史引年乞休

國朝順治初以大理卿起用進刑部侍郎奏定律例可
壯刪繁去苛與有力焉年七十餘卒謚曰安恪

張布萊蕪人善讀書以父老丁繁乃焚筆硯應賦
役遇逋賦迫索至鬻男女者布即慷慨代完撫弟極

友愛弟卒視其子女有適于己所出婚嫁必先之或有以倫序告者布曰此無父者也若等父在何憂進暮耶歲饑焚千金之券復捐貲助賑鄉里多稱之為隱君子焉

仇維楨字羽王益都人前明萬歷己未進士由中書擢禮科給事中立朝侃侃多所獻替累官兵部尚書國朝初被

召入都以衰老乞骸骨歸里卒

韓國璽荏平人前明天啓甲子舉人

國朝初授湖廣潛江令甫至任以拂上官罷歸所著有
高士傳大學行義行世

杜之棟郟城人前明天啓甲子舉人順治辛卯山賊
寇郟城之棟罵賊而死

孫肇興字興公莘縣人前明天啓壬戌進士授山陽
令陞主事忤璫論戍

國朝擢天津兵備累遷廣西左藩仕終工部侍郎

孫雲龍字騰霄壽張人幼孤事母備極孝養雖遭饑
僅流離而問視如常甘旨弗缺性尤沉潛理學常曰
讀書不能學聖賢之學而僅識章句能文字末務也
因躬行不怠數十年操履純篤卒為名儒學者多宗
師之卒祀鄉賢

王鰲永字澗溯淄川人故明天啓乙丑進士累官副
都御史巡撫鄖陽進戶部侍郎

世祖章皇帝綏定京師首先迎順以原官招撫山東行至

青州為鄉民趙應元所殺

賜塋地一區廕一子

汪元度臨清人篤于孝友秉性介潔家貧有友懷金欲贈之察其詞色中不敢出諸子在鄉里遇人構難善持平多為罕譬不欲以訐為直卒祀鄉賢

趙振業字墜垣博山人前明天啓乙丑進士知邯鄲縣有治劇才邑雖衝而政游刃秩滿行取監察御史出督漕運巡視荆南皆有政績

國朝初以山西督糧道起用肇興水利清核廢藩之產
不遺餘力改廬州兵備使致仕歸

李允徵字徵甫德州人以舉人授故城知縣尋改豐
縣豐邑素稱刁頑允徵杖弊土豪數人刁風頓息入
為南城指揮陞工部主事督清江船廠剔弊釐奸吏
畏而商悅為判漕使五集陞廣西左江僉事以病致
仕歸尋卒

法 寰號怡雲膠州人前明天啓丁卯舉人好讀書

授徒墨水之濱多所裁成

國朝除靜海令值歲祲捐俸散賑并勸當事者出粟煮粥以濟飢民全活無算癸巳秋膠鎮海時行叛時寰里居罵賊而死併二子與選皆遇害公舉入鄉賢祠王勤正諸城人自幼性至孝事親盡禮好施樂善嘗周人之急濟人之困鄉人愛之卒祀鄉賢

丁允元字長人日照人前明崇禎辛未進士授中書舍人擢戶科給事中拜疏改日照條鞭邑享其利論

列權相鑄級調外入

國朝知蘇州府時積弊之後允元因事釐正綱紀燦然
陞廬州副使丈民田清欺隱不增虛畝以病百姓屬
邑邪教獄興悉縱株連者後起榆林道以母老不赴
房辰魚臺縣恩貢生學極淵通於五經諸史皆精
研得其要領尤以孝友著聞其他建宗祠修學宮義
所當舉無不竭力為之鄉評嘉許歿舉祀焉

李植利津人前明崇禎甲戌進士授陝西韓城知

縣開渠灌田捐粟賑饑行取監察御史

國朝順治九年巡按河南甫歷河懷二府值撤差尋丁母憂遂絕意仕進卒于家

張弘範膠州人庠生至性純孝尤篤友于之愛家貧常授徒遠方以故年踰五旬尚乏嗣妻趙氏為置一妾色絕麗將就寢詢知妾故有夫緣被重累不得已自鬻遂危坐達旦即遣還之州人以此益推重焉卒

祀鄉賢

李化熙字五絃長山人前明崇禎甲戌進士湖州府推官訊獄慈祥累官總督

國朝以工部侍郎改兵部晉刑部尚書特疏請復朝審并遣各直省恤刑永著為例

耿章光館陶人由崇禎丁丑進士任山西曲沃縣知縣至尚寶寺卿以父如杞勤王被陷死于極刑為刺血明心一疏代父鳴冤舉朝悼憫追復如杞原官卒祀鄉賢

趙國佐滋陽人前明崇禎己卯舉人至

國朝順治己亥需次得新野令以蘇民因為已任設施
未竟而卒識者多致悼焉

伊光啓字開雍新城人天性淳樸內行尤謹事繼母
如所生事兄如父兄老無子以長子闢為之後後以
闢貴贈中大夫益自謙抑橫逆之來犯而不校遠近
稱為長者壽九十卒

李森先字琳枝掖人前明崇禎庚辰進士

國朝初授監察御史巡按蘇松尋以失出逮獄民焚香詣闕訟其寃事白復其原官

孫廷銓字枚先博山人明崇禎庚辰進士順治初以薦授河間推官累陞至吏戶兵三部尚書尋拜秘書院大學士廷銓司銓政最久以慎名器通淹滯為已任故倖進之徒多不滿意及入贊綸扉勤修庶政竟歲未嘗休沐兼以具慶在堂溫清念切康熙初

予告歸里卒官給葬祭謚文定所著有止亭詩文集漢

史億歸厚錄顏山雜記等書行世

張端字中柱掖人前明崇禎癸未進士

國朝召用累官至大學士卒謚文安 竊攷

國朝召用故明文獻皆登顯要其官至大學而得

賜謚者如德州謝陞乃萬厯丁未進士崇禎時官建極

殿大學士

國朝加柱國太師卒謚清義

賜塋地一區而舊志不載獨於孫張二元老書銜書謚

其故何歟

孫建宗字毓祺歷城人前明崇禎癸未進士入

國初授為祁縣令有惠政累遷至睢陳兵備道革舖行免民
夫招流移去虛糧逃亡歸故土者至二千餘家終太僕寺卿
張彥士定陶人行醇學博事親以孝著稱母歿哀毀
逾禮五晝夜米勺不入口父涕泣勸之始少進食飲
後居父憂亦如之順治初以歲貢司訓黃縣尋陞貴
州赤水衛經歷未任以疾乞歸鍵戶讀書所著有讀

史轡疑十卷小學忠孝行世卒祀於鄉

朱鼎延聊城人前明崇禎癸未進士歷任至工部尚書陳情終養旋里問寢視膳曲盡子道潛心程朱之學時以正心誠意持已訓人素甘淡泊雖位至司空全不經營資產東郡考院傾圯捐金修整至今煥然卒祀鄉賢

任孔當濟寧人前明進士曾任山西陽曲知縣以丁艱回里旋值流寇猖獗充屬多不保而濟寧又多寇

黨孔當捐貲招募躬親堅銳掃除寇氛閭州咸荷更生後于順治十七年以壽考終公舉祀之

張丕古字百嶼嘉祥人前明崇禎癸未進士性穎異讀書嗜古尤工詩賦

國朝順治二年授翰林院編修丙戌即分校禮闈所拔多名士時翰林院分局纂脩明史同輩每推之曰此非張百嶼不能辦也未幾以父憂旋里服未闋卒所著有皇華偶紀行世已丑使南閩作也

周伯達字洱如萊陽人前明崇禎進士累官山西僉事

國朝順治初年起巡撫甘肅時羌民尚懷疑懼伯達宣布德威未旬日皆歸化尋改江寧巡撫有故帥吳勝兆叛伯達星馳擒戮之至其裁汰繹夫清除漕弊抑客兵之橫杜告訐之風三吳之民實賴以休息江右金聲桓為逆督臣羽檄旁午數日間伯達措餉三萬船八百隻以應視事九月憂勞致疾卒于官

范明徵霑化人歲貢生博涉經史著作甚富人皆稱
為通經博古之儒

李呈祥霑化人前明崇禎癸未進士授翰林院編修
國朝順治三年任國子監祭酒歷詹事府少詹以建言
謫居奉天八年

赦還里居窮約以教授生徒為俯育之資有旂婦陳氏
欲入空門守志而其主不允呈祥聞之緘歲修為書
屬其主而贖之乃為尼聞者感其義

黃圖安字四維堂邑人前明崇禎丁丑進士入

國朝歷仕至甘肅巡撫清介有聲

周爰訪字延成寧陽人前明崇禎癸未進士入

國朝授翰林乙酉分校北闈丙戌主試荆楚甄拔悉知名之士士林誇藻鑑者至今傳誦焉陞弘文院編修卒于京

苑生瑞寧陽人明季生員力敦孝友五世同居因廣建房舍召族子弟之無力就學者命其訓誨之成就

甚夥歿於康熙三十年鄉人公請祀之

焦毓慶字善餘章丘人順治甲申拔貢授江西永新令清白自誓會金聲桓為逆毓慶罵賊而死妾劉氏併僕劉治張乾皆盡死節

王登聯字捷軒茌平人扈從入關占籍旗下初授鄭州知州累官至大理卿折獄定讞多所平反出為保定巡撫清介無所容物以諫圜地死康熙中

賜葬祭謚愍愍蔭子四品京秩

王荃可字遇符益都人順治丙戌進士由中書考授
監察御史巡按廣西值滇逆寇陷粵省荃可不屈死
之事聞詔贈太僕寺少卿廕卹如例

周如春字麗陽金鄉人順治初由歲貢知江西星子
縣有吏才為士民所感戴會金逆之變孤城被圍糧
盡乏援而陷如春被害妻妾賓從同殉難者凡二十
一人邑士民為建忠烈祠以祀之

馬國徵字明生博興人順治乙酉舉人任直隸大名

知縣天性純孝居喪三年未嘗見齒居官善於催科
不用鞭朴蒞任三月教化大行至終月無爭訟者卒
祀名宦鄉賢

艾元徵字長人濟陽人順治丙戌進士時父馥以永
明令致仕家居元徵怡怡色養庭對之外絕不問家
人產後以宮僚得任子元徵無所出父曰爾諸弟能
自強從兄元燾吾甚愛之當以其子為後乃任汝霖
元徵官至刑部尚書卒後汝霖官鶴慶知府有清白

聲能克承先志焉

王 度字平子泰安人順治丙戌進士性孝友行事亦敦厚和平由大同令擢刑部主事恤刑江南之安徽池太四府多所平反全活甚衆累官戶部侍郎以年老致仕歸居鄉謙謹年八十餘而卒

藍 潤字海重即墨人順治丙戌進士自庶吉士歷陟侍從出為江南上江督學搜拔寒峻士論悅服轉福建右叅政值海寇攻榕城率衆守之城得完又補

廣東左叅政招降蘆田橫水諸寇尋司臬江南獄多
平反陞湖廣布政使吏議前鞫失守事坐削職歸
寧之鳳字德九寧陽人順治丙戌進士初受工部主
事遷郎中擢知河南府時有流寇遺黨鼓惑兵民約
於正月十六晚襲城之鳳聞之急聚集敢死內丁二
十名選衙丁精壯者三百人伏於城濠二更賊果大
至之鳳即躍馬突出伏兵皆起賊衆驚竄殲厥渠魁
一城以安後歷陞陝西布政使卒于官

李道昌海豐人順治丙戌進士授監察御史仕至大理寺正卿道昌係遺腹子有至性五六歲時嘗以父容問母母指示其形狀遂屢夢見其父即起繪之後竟得其形似巡按河南當流寇殘害民未安堵道昌力事招徠興利除害餘寇招安者二千餘人流亡得以復業及任大理心存平恕全活甚衆卒崇祀鄉賢張四教萊蕪人為諸生時以歲薦讓同舍人高其誼順治丙戌成進士授山西平陽司理以明允入上考

擢刑部郎視學山右所得士旋發甲榜者二十六人
晉陝西兵備道至則兵戢民安政聲益著其生平訓
子弟讀書則以立身為第一義作家則以早完官稅
為第一義故張氏一門端謹奉法無掛吏議者歿後
公舉入祠

楊宗震字嚴四濟寧人順治丙戌進士授陝西興安
知州招徠安集疆域以寧改任乾州尤多惠政轉江
南驛鹽道時江洋適有寇氛宗震造理戰船晝夜不

怠於民不擾而軍需早備尋以勞卒於官

劉芳聲字茂遠魚臺人順治丙戌進士由主事累官
鞏昌知府招流移勸開墾繕城賑饑美績甚著尋陞
桂林道赴任便道省親適其父病篤將屬纊而芳聲
至其父復甦執手留連越日乃逝人以為純孝之感
服闋補貴州畢節道改平大黔威守道以裁缺歸居
鄉三十餘年設義學施藥餌鄉族多蒙其德子澄亦
好施樂善有父風卒皆祀於鄉

張啓泰字開之長山人順治丙戌進士初知鳳陽縣
歲祲捐粟賑饑全活數千人再任淇縣淇當孔道舊
有運車為累啓泰設法歸驛民咸德之以卓行入為
兵部郎歷官至嶺南道僉事以疾卒於官人共惜之
朱 虛字若虛荷澤人順治丙戌進士初知衡水縣
稱循良第一擢監察御史巡視中城力剪強橫不避
權貴旋督學秦中至則定試額遴拔寒畯政教一新
會停差改授浙東叅議報最擢肅州副使未任以疾

致仕歸筭惟圖書數卷而已居恒讀書嗜古所著有詩經箋右今疏於園集行世卒於家祀鄉賢

李 炘字闇修長山人順治丙戌進士任衢州府推官聽斷明決郡稱神明時劇盜熊竒方寇掠浙西炘設法捕之其餘黨又陷台州炘往設防禦賊平歷官至刑部郎中以疾歸

王天眷濟寧人順治丙戌進士官行人兩次遣封安南贖遺一無所受分校順天鄉試矢公矢慎所得多

名宿後位司空半載即力請告歸鄉評重之

邵士標濟寧人順治丙戌進士授河間推官審讞獄
囚事多平反擢御史條奏皆切時弊遠近稱焉

李适字長倩壽光人順治丙戌進士知內黃縣尋
調湘陰兩邑俱有循績

張初旭臨朐人順治丙戌進士授湖廣辰州推官經
理寧鄉縣墾荒事有條理却除長沙漕例羨金政聲
卓卓時經略洪承疇疏薦其賢將召試擢用初旭辭

曰士以譽而進必以毀而退吾不為也遂引疾歸
趙尹振號錦曇齊河人性倜儻尚氣節順治丙戌成
進士任阜城知縣勸農課士有治績尋調衡山時闖
賊餘黨突陷湘潭或勸尹振棄城去振不許城陷死
之

陳益修濟寧人順治丙戌進士初任貴池令時大軍
南伐供應浩繁益修調度有方不勞民力旋陞主事
督荆關稅務課裕而商不擾人皆感之

朱長泰德州人順治丙戌進士任江南含山知縣為政果斷獎善必力除惡務盡三年考成廉敏稱著

李邦彥益都人汶上儒學教諭順治三年土寇陷汶上邦彥死之

張其抱字仲展高唐人事母至孝嘗焚香告天願以已年益親壽母卒哀毀盡禮事兄惟謹共爨終身後成順治丙戌進士官虞城知縣宦成之後與兄怡怡朝夕邑人俱賢之

葉承宗字奕繩歷城人性好學讀書必究根柢順治丙戌成進士授臨川令值贛鎮金聲桓為逆臨川城陷承宗死之其弟承祧跳城奔告征南譚大將軍譚奇其才貌兼憫其兄忠義因劄委興安令事平改補平陽郡丞擢守西安亦多惠政人稱不愧其兄云

楊大觀蓬萊人樂施好義族中子弟貧不能讀書者皆捐貲引掖之甲申乙酉間歲大饑竭所有以周族又為白姓贖妻完聚鄉閭稱頌無異詞卒以子貴贈

文林郎

郭震擢汶上人以廩貢任陵縣訓導旋攝縣篆當土寇蜂起與紳士登城守禦寇不敢犯居家事母至孝母病目失明震擗延醫禱天備極誠感母目復明人咸異之

張重潤萊陽人以歲貢授河南陳留知縣值兵荒水患之後竭力招徠躬踐泥淖審水勢以為疏導水不為災時匿田之禁方嚴及供兵供驛頗為民累重潤

皆涕泣請寬首崇學校人文振起前明壬午萊陽兵燹其父母同時殉難重潤哀號匍匐求骸骨於烽火中棺殮如禮人稱其孝

張爾岐濟陽人順治初貢生淹貫經史遠近學者宗之性孝友服親喪三年號泣不輟殯葬悲遵古禮與兩弟分居田廬之美好者皆讓於弟以二弟有殘疾為代納賦稅三十餘年及易簀時猶遺言囑子代納以終二弟之身著有蒿菴集儀禮鄭注句讀周易說

略新濟藝文等書卒祀鄉賢弟爾崇亦知名於世著有尚書通義五卷

馮溥字孔博臨朐人家世貴顯代有名人溥生八歲受左氏春秋暨秦漢以下古文即能貫串根抵稍長窮極經史凡天文圖緯及兵書地志罔不博綜順治丁亥舉進士授翰林院編修屢遷至侍讀學士尋陞吏部左侍郎時尚書孫廷銓病目右侍郎石申亦以事注籍凡一切推補溥獨主之一秉至公無所曲

庇康熙初年四大臣秉政議各省遣大臣二人巡察督撫溥力爭以為不可乃止陞都察院左都御史於是有所申嚴職任暨省刑薄稅等疏未幾遷刑部尚書辛亥拜大學士有特薦魏象樞成性疏又有發帑備荒疏在閣二載開誠布公表裏洞達既不詭隨又不矯激商略大政或僉謀可用即庶僚不遺若義所不可雖貴近交口而溥必力爭改正總求有益於國而中無成心至二十三年溥年七十有四引年乞休抵

里後加太子太傅卒諡文毅

李之芳號鄴園惠民人順治丁亥進士授浙江金華推官燭奸理枉讞決如神陞刑部主事進郎中清理積案皆極精敏尋改監察御史巡按山西又巡視兩浙鹽課凡在臺中十四年忠謀謹議皆關大計所彈劾不避權要遂超遷左副都御史旋加兵部侍郎總督浙江軍務其明年耿逆煽動之芳以衢州係全浙上游且為江淮屏障即日自杭移駐於衢時有異議

者皆置弗聽及耿逆重兵壓境為書以甘言來誘之
芳立斬使焚書誓師出戰以卒四千破彼數萬賊勢
大挫方戰時之芳皆親冒矢石或勸其宜持重母親
蹈不測答曰吾若貪生誰不惜死以此人皆奮力効
用及溫台從逆沿海告警而賊將李九玉等又盤踞
仙霞之西以通江右衢以屹然一鎮在衆敵之中或
議棄衢退守之芳獨堅持不可日夜申戰守之備卒
之大軍入閩長驅三關賊指日面縛而全浙無恙者

皆之芳親捍三衢力也自身在行間歷九年乃凱旋入杭康熙二十一年陞兵部尚書去浙之日士民號呼如失父母尋轉吏部尚書拜文華殿大學士

予告家居七年而卒謚曰文襄

焦毓瑞字石虹章邱人順治丁亥進士以翰林改授御史巡視通倉別除積弊繼視河東鹽政奸商大猾為民害者一一戢禁之累官少司寇改少司農卒於官

任克溥字海眉聊城人順治丁亥進士初任南陽府推官時值兵燹後人民逃竄克溥鋤荆棘刈草萊治城郭修學宮設義學撫流亡期年之內百廢具舉擢垣中凡所建白皆裨治理累官至刑部侍郎卒祀鄉賢

杜 濬濱州人順治丁亥進士初除正定府推官隨總督張存仁平榆園賊所俘獲咸就訊於濬濬錄渠魁釋脇從凡活數百餘人擢禮科給事中抗疏言黃

河潰決由濱入海淹沒民田皆由河員防治不力請遣大臣行河尋轉河南驛傳鹽法道竭蹶供職事無鉅細必躬必親後以疾篤乞歸先是在維揚以無子娶江寧崔氏女為妾既見詢知為士人女遽遣歸復贈十金以為舟車費人咸欽其厚德云卒祀鄉賢

宋琬字荔裳萊陽人順治丁亥進士授戶部主事監督江南蕪湖關潔已恤商歲額轉逾於舊遷吏部稽勲司在司兩月選人無滯抑之歎出為隴西道值

地震後修築城垣瘞屍賑粥生全者無數隨督隴西
學政清慎公明號稱得士歷永平兵備及寧紹台道
軍民咸戴其德尋陞四川按察使致仕歸其居家尤
敦孝友虛懷下士樂為薦揚工詩古文詞盛名滿于
天下時稱南施北宋施謂施閏章也歿祀鄉賢

黃敬璣字在之濟寧人順治丁亥進士事繼母甚孝
侍繼母弟極其友愛宗族鄉黨俱無間言初授江南
安慶推官廣置學田以贍貧士屬邑山賊竊發敬璣

單騎諭降併曲為撫循人皆感激尋擢監察御史內
陞未補而卒

公家珍字明璧蒙陰人順治初以選拔貢知河南襄
城縣時豫省殘破之餘流氛未靖家珍竭力拊循招
徠復業者甚衆秩滿陞黃州府同知

劉淮城武人以歲貢為濱州學正轉國子監丞剛
方嚴正力倡理學刊覺悔集先正格言以訓學者居
家至孝恤族賑荒多厚德歿後公請祀之

李之莊號雪巖惠民人太學士文襄之弟歲貢生天性至孝友愛敦篤文襄督兵勦逆之莊奮不顧身募鄉勇礪器械從事戎行頗多贊助州學傾圯捐貲修葺復設義學教育單寒三十餘年不廢歲饑輒於通衢設粥廠以食餓人全活無算州東南有徒駭河每衝決淹沒田廬倡築堤岸以禦水患閭州賴之卒祀鄉賢

孫揚聲字靜來萊陽人由舉人授鄖陽府推官家素

貧而敦篤族誼每不遺餘力任鄖陽清操愈勵淡泊甚於家居順治四年山寇猝發郡城失守揚聲獨挺身拒賊力鬪不支被執慷慨罵賊遂以身殉贈湖廣按察司僉事廕一子

沈夢鯨蓬萊人由貢生初任順天懷柔知縣陞福建建寧府同知政教甚著順治四年建寧土寇王祁烏合逼城下夢鯨與知府高簡拒守兩月鯨率子時宜時化及家丁沈平等二十二人率本城義勇突出以

戰時賊兵甚夥衆寡懸殊鯨被鳥鎗傷重時化負父以逃死于僧寺時宜沈平等皆死於兵後督院佟提兵南下時化誓報父仇投充健卒斬關斫殺多人大兵乃長驅以平賊衆時化隨扶父柩回籍

伊闕字盧源新城人順治戊子解元乙未成進士由翰林改御史巡按山西康熙十九年以副都御史巡撫雲南時值大軍平逆主客兵以數萬計措辦軍需安慰百姓焦勞成疾竟卒于官

李允徵字遠公曲阜人順治戊子副榜任溫州太原二府通判皆有政聲居家孝鄉人重其德行從游者不可勝計歿後公舉祀於鄉賢

朱弘祚字徽蔭高唐州人三省總督昌祚之弟舉順治戊子鄉試選授盱眙令以廉勤自飭值歲歉申請蠲賑復自假貸二千餘金煮糜飼之鄰封就食者常數萬人訖無流殍以卓異補刑部郎發奸摘伏寬獄多所開釋出守直隸亦著聲績遂撫兩粵抵南雄首

革庚嶺役夫勒石永禁先是粵東軍興芻茭靡屨之
需征至百萬餘金反浮正供弘祚亟為裁革臨高澄
邁吳川諸邑殘於兵燹邨舍為墟疏請蠲賦以招之
流亡悉復故業上鹽法八疏皆中機宜尋改總督浙
閩飭營伍覈餉械嚴扣剋東南壁壘一時改觀後奉
修南河卒于工所

王清字素修海豐人順治己丑進士官吏部侍郎
務持大體為銓部名臣兩典會試三充讀卷官俱稱

得士在史館譯修經史定條例復舊章年四十三卒
時人惜之

韓理字長公淄川人順治己丑進士授松江府推
官旋視府篆粹有海警理多設方畧城賴以安邑人
立石記其功

程際雲平陰人順治戊子拔貢當甲申乙酉時際雲
嘗奉二親避難在平及城陷倉皇負母涉濠水深滅
頂際雲常若足下有支柱之物既濟而視之前後渡

者皆不免人謂孝感所致康熙元年授順德府通判
融融祿養得天倫之樂尋陞廣西梧州府同知以道
遠不得迎養遂辭以疾父母年皆九十餘歲後服闋
擢補貴州石阡知府卒於任

蘇之中武城人監生天性純孝好善樂施卒祀鄉賢
唐夢賚字濟武淄川人順治己丑進士授翰林檢討
以上疏言事不合例罷歸家居閉戶銳意於詩古文
詞故著述甚富有銅鈔疏禁糴說備邊策皆留心經

濟之書

王 鏌字伯和諸城人生而穎異登順治己丑進士
授戶部主事晉本部員外郎乙未出守饒南時饒新
被兵戍卒驕悍多有收良家子女者鏌出囊金贖
寧家擢副使尋陞黔臬治獄多所平反土司龍瓚本
不謀叛貪弁襲執為功鏌破械出之曰若貪功而令
我枉法殺人乎晉江南布政使時藩署新設極稱繁
劇鏌慷慨受事切究利弊原委期年卒于官

宋可發膠州人順治己丑進士初令福建將樂縣有惠政山寇款服歷臬晉蜀獄無冤抑擢粵東布政告病歸卒

盧運昌陵縣人順治己丑進士任遠安令多惠政時有巨寇攻城運昌多方固守城賴以全又請賑饑民之流遺者全活甚衆

吳表一嘉祥人順治己丑進士知湖廣漢陽縣設義渡除行稅為楚北循良吏以病乞歸卒祀鄉賢

陳兆鸞濰縣人順治己丑進士仕至河南彰德府知府正己率屬吏戢民懷有古循良風卒祀鄉賢

王功成博平人順治己丑進士任山西長治縣歷官至江南驛傳道際三藩之變羽檄如織功成整理舟車按期接應署按察使事大獄多所平反卒祀鄉賢
陳朱垣寧陽人順治戊子拔貢初授鞏縣知縣遷江寧府同知旋告歸行李蕭然林居二十餘載足跡未嘗至縣庭惟訓子弟課耕讀以樂餘年邑令舉飲賓

者再皆不就

朱應麟字石袍單縣人稚齡有至性父病籲天求減
已壽以益父病果瘳誼篤姻族助舉喪者數十計代
完娶者亦十數人而其尤表著者贖榆園賊之擄婦
拒李化鯨之來寇鄉人實賴其德後以子珵封奉政
大夫祀鄉賢

朱克配字堯天寧陽人勇於為義為齊魯知名順治
初土寇蜂起克配練鄉壯每擒敵必身先之鄒滕汶

泰間恃為保障後隨大軍平定江南徐邳諸州皆克
配傳檄而定攝邳州篆授六安叅軍署霍山等縣草
竊之輩一聞克配名皆輸誠歸服蕩平之後即投劾
歸里邑人感之公為請祀

田實栗字裕所德州人庠生天性孝友操行端方家
貧授徒一時從遊者皆成端士為諸生三十年未嘗
一至公門鄉黨咸推重之卒祀鄉賢

鮑化龍長山人性至孝慷慨好施舉鄉飲大賓卒祀

鄉賢

李 簠日照人性至孝友為諸生時嘗教授生徒語
人曰寒儒處盛明之世無所謂功業也惟陶成一二
人物可以儲國用耳順治辛卯登賢書授蓬萊縣教
諭乙巳遷安東衛教授課士規條一如家塾秩滿陞
江西浮梁知縣感然曰吾堪為人師長不能為民父
母也然君言不宿吾勉赴之未期年即稱疾告歸乃
出已貲鑿義井三以便汲施地一區以公貧不能葬

者至今鄉人猶頌德不衰卒後十年公舉入鄉賢祠
張瑞徵萊陽人順治壬辰進士選庶常洊歷宮允出
為汝南道汝南水旱頻仍荆榛滿路瑞徵下車即修
葺城垣捐資賑濟地方漸有生人之樂其折獄明敏
辨冤晰枉尤表表一時光州賊襲商城會勦擒戮瑞
徵之力居多其典試兩浙所拔皆知名寒士至居鄉
訓子孫惟務忠厚戚黨待舉火者甚衆後以壽考卒
于家公舉祀之

劉必顯諸城人順治壬辰進士任戶部主事管八旗
戶口守正不阿監督通州中南倉一切陋規盡行革
除司權無湖鈔關嚴禁蠹吏需索商民德之終戶部
員外郎卒祀鄉賢

劉毓桂字宮培壽光人順治壬辰進士授揚州推官
剖決明析平反冤獄發江洋大盜寘舞文吏于法海
寇掠江南潤浦瓜儀皆震毓桂登陴城守指畫方畧
寇知有備遁去舉卓異尋以誑誤歸里

田緒宗字衍文德州人順治壬辰進士授浙江麗水知縣勾稽土田戶口之籍不任胥吏徭賦以清修復邑西通濟堰障松遂兩溪分支流四十八以灌民田在任甫五月卒于官民甚惜之

李士模高密人順治壬辰進士初知河南桐柏縣以才能調直隸盧龍兩邑治政皆稱循卓仕終大理評事

劉新國陽信人由歲貢授陝西鎮安縣令鬻田產以

自給鎔銖不取民間鎮安地瘠民多逃竄百計招徠
一年之內漸次復業有盜嘯聚山林出沒為害新國
單騎諭以利害悉倒戈而迎百姓安堵以積勞乞休
卒祀鄉賢

王 騰號辰嶽福山人順治乙未進士初授戶部主
事歷轉刑部郎中陞四川松威道時兵氛未靖轉餉
深入險阻兵賴以濟勦撫巴豬等寨恩威並用邊徼
永寧蜀中有採運楠木之役雲棧路險運送甚艱適

代藩司入覲即繕疏奏請免之蜀人至今感頌轉口
北道內陞卿貳出撫江西潔已率屬甫兩月總督浙
閩聞楚中夏孽跳梁移鎮延平居閩浙適中地為犄
角以壯聲援賊尋平陞戶部尚書以年老乞休歸里
八十二歲卒祀鄉賢

王 陟福山人以孝弟好施聞于鄉尤嗜學詩字可
追晉唐風力

孫光祀平陰人順治乙未進士好讀書尚氣節在諫

垣疏凡二十餘所陳皆切要其不下部議而徑行者亦有之累遷兵部右侍郎歲己未歸田越明年歲大侵出粟五百石以賑全活無筭至如睦族黨周貧乏設義學建橋梁懿行班班又其餘事云卒祀鄉賢

李贊元海陽人五歲而孤事母盡孝少貧乏其母檢舊券不下千金贊元閱其人亦多中落竟白其母焚之順治乙未登進士選庶常改授御史巡按三楚值歲饑即捐資市穀以賑全活無數水灾壞民田廬又

倡捐築堤植柳迄今猶多賴之旋巡視兩淮鹺政潔躬除弊調劑得宜商灶歡呼凡所施行皆裨鹽政累陞督捕侍郎條議分別窩逃及誤娶逃人外生之女當免議刊八條例實造後人之福後簡任樞府告歸旋逝

黃貞麟字振侯即墨人順治乙未進士授鳳陽府推官時值大獄蜩紛如海寇逆案逮及失出守令逋賦案逮及諸生百人劫鞘案逮及他郡紳士凡有承審

貞麟皆虛心研訊無辜者多省釋以推官裁缺改令
鹽山擢戶部主事為倉務註誤歸里卒

王如辰字北野膠州人順治乙未進士初授直隸交
城令交治多山綿延百里積寇盤踞時時攻劫為害
如辰之任七日即設計擒渠魁歸京師正法邑患虎
為文檄之虎逸去擢戶部主事歷郎中出督學廣西
時值兵燹九府學宮大半鞠為茂草乃倡捐建之復
于桂林建華掌書院擇諸郡名士讀書其中所造士

甚衆粵西風氣遂為之一開

曹申吉字錫餘安邱人順治乙未進士由庶常外轉
分守湖廣鄖陽治政循卓而尤長於聽斷督撫交章
薦之蔣歷禮兵二部侍郎酌復舊章多所建白出撫
黔中奏改衛所歸併州邑以一事權招撫生苗編隸
版圖廸以文教不三年而吳逆叛於滇黔帥從賊內
應執申吉不屈舉家被害

張我鼎清平人順治乙未進士任四川鹽亭縣知縣

行取戶部主事分理糧儲出入嚴明吏不敢欺卒祀鄉賢

王曰高在平人幼有神童之譽由順治乙未進士授翰林改給事中在科垣十有七年多所建白而杜門焚草可謂直而不諒歲癸卯典試江南得兩鼎甲五尚書三大學士亦可稱得人之盛者所著有槐軒集行世

王士禎字貽上新城人順治戊戌進士吏部員外士

祿之弟初任揚州司理讞海寇重案全活甚衆以才
名內擢旋由部曹改翰林屢遷至兵部督捕侍郎旋
改戶部持中會計屏絕膏潤及轉右都御史則抑奔
趨崇恬退深得風憲大臣之體士禎詩文氣誼冠冕
士林六十年海內奉為宗匠所著述甚富家刻共三
十二種歿後揚州人祠祀於平山堂與歐陽修蘇軾
共稱三賢云

丁泰字來公日照人順治戊戌進士授陳留令時

楚南未靖師旅往來供應不貲泰一意休養民免驚擾考績稱最補吏科給事中尋掌工垣前後條議如嚴漕折清屯逋弛海禁察侵欺無不中窾予假歸里卒人皆惜之

任 珮高密人順治戊戌進士仕至監察御史正色立朝中外推重嘗巡視長蘆鹽政絲毫不苟凡便益鄉里之事必請於朝而後行歲己未邑大饑捐穀千餘石以助賑又出貲千餘金以修學宮邑人至今誦

之

張志禧昌邑人順治戊戌進士任直隸高陽知縣政
治和平旗民不擾擢吏部主事遷本部郎中纂修吏
部會典不浹旬稿脫乙卯請假歸里首捐金倡新學
宮建設義館邑士人咸感戴之卒祀鄉賢

趙增汶上人明翼城令堪之弟增以順治戊戌進
士初授山西安邑知縣再補福建閩縣時閩寇初平
增力求綏輯撫循備至旋擢兵部督捕主事以安靜

為務株連之累一蘇後引疾歸里督課子弟甚謹以
壽考終祀鄉賢

劉果字穀卿諸城人戶部員外郎必顯子順治戊
戌進士為太原推官常存矜慎每判一囚必求其生
於萬一未嘗以讞語假人奉裁改河間知縣裁汰陋
規力行保甲吏民畏威懷德授刑部主事會纂修例
律於條例異同多所訂正博核精敏同僚稱重已未
視學江南取士得人文風一變因內艱歸不復起卒

祀鄉賢

蕭惟豫德左衛人順治戊戌進士翰林院侍讀提督
順天學政力拔孤寒實緣盡絕年甫逾三十即以終
養乞歸

黃運啓昌邑人順治戊戌進士初令浙江新昌縣多
惠政歷陟兵科給事中亮直端謹克稱厥職以疾卒
於官

伊 燾新城人順治戊戌進士歷任思南寧國推官

矜慎庶獄以明允著稱有祥刑遺愛錄行世卒祀鄉賢

楊維喬寧海州人由順治己亥進士選庶常考授監察御史出為口北道有積棍暴恣久為民害維喬懲以重法復宥之以情遂皆洗滌成良民尋以親老不忍暫違力請終養以歸歿後公舉入祠

崔迪吉在平人順治己亥進士任陝西白水知縣取與必廉然諾必信鄉黨稱其孝友始終無間

于覺世字赤山新城人順治己亥進士授歸德府推官以裁缺改知巢縣縣帶山瀕湖號稱難治覺世為政寬簡間以嚴劑之俗好巫尚鬼覺世捕其首奸風俗乃改庚戌江北饑巢邑尤甚覺世捐俸錢購米以食饑者全活數萬人癸丑滇逆發難有巨寇宋某起安廬間衆數千人攻剽邵邑將據焦湖以應之揚帆自大江東下覺世知之設伏于南門浮橋身率甲士邀擊之殲其巨魁安廬之盜遂絕後以禮部郎中視

學廣東其教士先德行而後文藝士翕然化之三年
報最擢布政司叅議致仕歸奉繼母甚謹鄉黨稱其
孝焉

孫必振字卧雲諸城人順治己亥進士初任懷慶推
官兌漕小灘鎮免例金二千兩且勒石永戒奉裁改
授陵川知縣陵經兵燹道路阻塞鑿山開道以通行
旅陵人號孫公峪行取為監察御史凡所建白皆切
時政巡鹺兩浙宿弊一清以疾乞歸卒於家祀鄉賢

馬 驥字宛斯鄒平人順治己亥進士任淮安司李
平反者三十案即奉裁補靈璧令革陋例除荒糧均
里甲請蠲賑凡便於民者盡行之卒於官

谷資生陵縣人順治己亥進士初任蜀之太平縣時
值兵燹後人多流移資生悉心招徠民始安集補榮
陽極意區畫榮逼近黃河資生築崇墉以防水決至
協濟軍興悉合機宜擢淮安郡丞未之任而卒

王 政陽信人順治己亥進士任直隸唐縣知縣縣

治濱河地畝每為水漲沙壓包累錢糧政親為檢勘
凡實在被傷處所力請題豁又請免每歲狐皮解
費四百餘金請散遞馬於要道州縣以蘇里社喂養
之累又力請廣入學之額功被唐邑不勝枚舉後歸
歿祀鄉賢

何廣汶上人天性至孝年九齡值歲歉親老躬自
拮据負米以供朝夕父歿事母甚謹勵志讀書順治
己亥成進士授江西豐城令明于聽斷剔弊釐奸士

民懾服母歿遂終身不仕

李雲鍾陽信人學耽經史號稱淵博以選拔貢成均
不營仕進務以義方訓子四方就學者亦甚衆皆親
切指示以孝弟忠信為諄諄其推衣解食尤其天性
終身未嘗有吝色歿後祀之於鄉

周治世寧陽人翰林編修爰訪之仲子以歲貢任利
津教諭天性至孝幼年父卒於京時土寇蜂起治世
於千餘里荏苒荆棘中徒跣扶櫬而歸竭力事母四

十年如一日其司鐸利津興起教化士習亦為大振
歿後祀鄉賢

周仔世寧陽人翰林編修爰訪之子父歿於京宦橐
蕭然時年甫十四與兄治世徒跣扶櫬還鄉以儉勤
自力事母備極孝養值歲饑有鬻妻以奉母者仔世
傾已糧以完聚之又篤於友愛兄弟之子多為所成
就以是鄉族重之

蘇金鉉濮州人為諸生時研理一本考亭順治庚子

舉於鄉初司鐸壽光再補靖海衛師範嚴整教士子
必先制行而後文藝遷國學助教與纂修會典督捕
兵部皆有聲稱以親老告歸敦宗睦族廣置義田卒
祀鄉賢

岳峯秀字鎮九汶上人順治辛丑進士初任河南封
邱令擢禮科給事中前後章數十上剴切詳明大臣
皆獎其能監督寶源寶泉兩局因同官素侵侮之遂
引疾不出卒祀鄉賢

孫蕙字樹百淄川人順治辛丑進士授寶應知縣
循卓有聲內擢戶科給事會三方底定之後請蠲陝
西田糧疏劾錄用叛帥蹇諤有聲所著有笠山詩選
歷代循良錄安宜治畧等書

王久任福山人由貢監任山西文水主簿潔已愛民
委監礦場于處膏時毫無所染人益頌其清正幼事
孀母以孝養孤姪以恩鄉里亦以孝友重之歿後公
舉入祀

李溉之長山人性至孝因父化熙宦于京師溉之善事祖母承顏伺色得其歡心後仕直隸灤州知州亦有聲績時人稱其忠孝兩全卒祀鄉賢

趙銳汶上人明翼城令堪之子事母至孝甲申乙酉間山左土寇縱橫銳奉母奔避雖倉卒間甘旨溫清未嘗有缺時平能復舊業自以名諸生貢後授萊州府訓導未任卒士林惜之

李挺生寧海州人由拔貢任威寧府通判告歸與同

胞二弟行止不少間迄老如一日焉州值盜起力佐都閫為防禦計頻設粥以飼兵民城賴以安賊平後凡脅從株累者復力為寬解全活甚衆歿後公舉入祀

董振秀平原人性警敏倜儻有大志明末土寇蜂起振秀練鄉勇為守禦又值歲饑捐貲施粥活饑民數萬人由明經通判太平以幹理常補二千石所不逮姑熟瀕湖稱盜藪振秀乃伏壯士舟中命二三羸弱

者擊棹陽為商賈狀盜望見遽登舟伏甲突出盡擒之累遷叅議尋遷福建副使會建寧兵薄城下累月振秀力為督守又率死士擊敗之獲糧數萬斛兵民賴此以濟

賈漢策字洛俊齊東人性端慤長於文章順治拔貢授興平縣知縣陞淮安府同知卒祀鄉賢

董允貞平原人副使振秀子天資竒穎年十五為郡諸生嘗從父之官多為贊勸董氏宗族素鮮饒裕允

貞倡為族社醵穀盈千石以供歲時祭祀餘則散族之貧者大畧仿范文正風云

孔貞燦聖裔以孝友稱為四氏學學錄兩胞姪相繼

為曲阜世尹徵燦足跡未嘗一至縣庭其狷介如此

陳祚熙莒州人幼有文名康熙元年登歲薦嘗傾產

修文廟建啓聖祠性最孝友好施予制行端方言笑

不苟卒祀鄉賢

李澍招遠人康熙癸卯舉人官江南靈璧知縣邑

中屢被水荒戶口流竄澍委曲招撫省刑緩徵捐俸
以給牛種並詳免逋賦數萬兩民皆復業靈璧河夫
累民又力為詳懇永免歲省役費六十餘金調補英
山撫育倍至詳免修葺宣樓舡隻民累永除至今德
之尋克南闡同考官勤勞致疾卒於江寧英邑士庶
猶有奔赴哭奠者今祀鄉賢

李元琳陽穀人康熙癸卯恩拔貢生敦族睦黨克敦
任恤之誼初任新城教諭再補肥城修學課士無忝

厥職秩滿陞授福建晉江知縣再任四川長寧知縣
皆卓卓有聲後卒於官

年作孚棲霞人廩生事親能曲體其志親歿偕昆季
八人奮勉成立家無厚貲好施樂善值歲歉躬訪殘疾
者量給以粟全活實多尤篤於獎勵見善必為勸勉見
人有過必力為阻遏之鄉人頗被其化歿後公舉祀焉
田 雯字紫綸德州人康熙甲辰進士初任中書舍
人改戶部員外時滇楚用兵軍需旁午雯請以白糧

附漕艘帶運費不煩而民力省至今著為定例陞工部郎中提督江南學政江南文氣散靡震力崇古學所取皆雄駿通偉之士風氣為之一振改補湖廣督糧道內陞光祿卿尋出撫江寧江蘇漕白為天庾要供是年秋雨積陰米色多變百姓艱于輸納震特疏以請民得隨時交兌又以運河至京口一帶地勢崇高鑿山成河易于埤卸向例冬日挑濬天寒風雪千夫荷鍤泥淖中艱苦萬狀震請動司庫大加挑濬

一勞永逸以省歲挑之勞費至今蘇常百姓德之其
他如減湖田之增稅免廬課之辦銅前後俱次第允
行調撫貴州時苗狃猖獗粵省方議會勦雲移書制
府謂制苗之法犯則治之否則防之而已若興師動
衆勞民傷財於事無益自是大征之議遂寢丁憂起
補刑部右侍郎尋調戶部出督河工以病告歸卒雲
於史學最深為文渾涵雄健成一家言所著有長河
集薑山先生詩稿

李迴壽光人康熙甲辰進士由中書累官至刑部侍郎沉静簡默不邀名譽每以哀矜折獄讞出其手雖九死必獲一生人以行善稱之

王斌先世為楚之龍門人世守太嵩衛指揮遂占籍焉以武解元中康熙甲辰進士任沂鎮前營遊擊駐防臺莊臺故漕衝加以比年軍檄交馳兵民兩困斌力除陋規禁侵暴嚴守禦遂皆安堵黃河決埽總河素重斌才委其辦理不旬日埽具河塞徐克不覺

供給之煩而所全活不下百千萬人告歸之日軍民士商攀轅者百里不絕性孝友親喪水漿不入口者五日兄弟多早殤撫遺孤皆如已出後卒於家公舉祀之

李復興字瑩斗濱州人康熙丙午舉人知華亭縣時松民苦里役逃亡相繼而婁邑尤甚復興乃與孝廉吳欽章等精思審計立為均田均役法一切年首甲首不便於民者悉罷之閭閻額手稱快而逃亡者以

次歸民不擾而賦亦以辦公私交利焉松人感德建祠白龍潭以祀之

安躍拔字文華聊城人康熙丙午武舉効勞兵部初從征荊州所向有功奉使慈利探賊消息直入巢穴與賊鏖戰洞庭先士卒憑河奪賊龍纛器械賊望風奔竄復夜渡精兵于江左分七路以進一呼先登擒獲無算遂振旅而還累官至淑州總兵官卒祀鄉賢董訥平原人副使振秀之孫康熙丁未進士探花

及第累遷翰林院侍讀學士督學順天士風整肅及
遷左都御史益自奮勵正色率屬論議務持大體嘗
清理刑獄多所平反尋以兵部尚書總督兩江兵民
安輯時新屯蠹政訥奏罷之復督漕運設易知小單
剔弊釐奸備極其法由是漕政肅清訥為人峭直沉
雄遇事不以難易回屈歷官中外皆著政績及歸里
也立族社設祭田一遵兩世家法後分修高堰以疾
卒于清河館舍

何 覲荷澤人康熙丁未進士官內閣中書舍人至性純孝年十二以父殉兵難卽欲解帶自縊門客李來賓勸以宗嗣大義且父柩在千里外理宜歸葬乃號泣扶櫬奉母歸雖干戈搶攘中卒得保全無恙居母喪哀毀骨立情禮兼盡分校順天乙卯鄉試矢公矢慎加意搜羅所得皆一時名宿卒祀鄉賢

賽玉紘文登人康熙丁未進士天性純孝事親能先意承志曲體親心凡諸父兄弟無不謀其溫飽完其

室家族中有逋賦多方措置代輸教子成進士自甘恬退不樂仕進布衣疏食渾厚和平為鄉鄰排難解紛人皆樂受歿後公舉祀鄉賢

丁時日照人幼與昆季鍵戶潛心經史躬自儉約以率鄉人嘗修邑乘紀載詳明論議有體成康熙丁未進士授內閣中書崇祀鄉賢

蘓廻武城人以貢生授福建建安知縣政簡刑清邑有巨盜據山肆毒民受其害廻招募壯士計捕而

殲之民始得安丁母憂服闋補光澤縣卒于官

郭琇字華野即墨人少時勵志清苦讀書深山中
絕壑榛莽四無人迹琇則蘊火中宵且泣且讀鹽齏
糞汲皆手任之康熙庚戌成進士謁選得吳江令賦
煩俗悍琇蒞事七年弊絕風清循聲為東南第一以
薦授監察御史初入臺即有特叅河臣之疏江南困
于水患誦公疏人人手額皆以為有更生之望尋陞
僉都有大臣結黨營私疏再進總憲有近臣招搖撞

歲疏一時輦下粟然數月中由郎官五遷至九列尋
以事降調又牽連吳江舊案逮質南中放歸田里自
是跼伏荒鄉人不知其掌憲大僚也已殂起田間以
副都御史總制湖廣一時墨吏望風解綬而琇則益
以鎮靜為先滌除煩苛務持大體諸如改折南糧請
減更名田租及奏銷緩征等疏天下受其賜既而疏
辨前誣歸田之志遂決凡五疏乞休乃得請歸里後
盡出俸金周族黨歲饑賑給澤在鄉閭乙未春卒邑

人公舉祀于鄉

趙文熹膠州人行誼醇粹學問淹博康熙庚戌進士
歷官翰林院侍講乙卯典試粵東矢公矢慎所拔多
知名士時人咸服其藻鑑云

耿願魯字公望館陶人幼穎慧六歲即通經史善詩
工楷書登康熙庚戌進士授翰林院編修癸丑克會
試同考焚香籲天期獲奇士以報國首得韓茨隨狀
元及第一時推為知人後卒于官所著有韋齋集七

卷

賽 璋文登縣人丁未進士玉紘子康熙庚戌成進
士父子接武捷南宮謙抑邇甚鄉黨益推重之璋初
授山西廣昌知縣再任臨汾雪冤理枉指不勝屈晉
禮部主事督大通橋運務積弊悉除由是糧艘直達
京師無復紅朽缺額之慮轉戶部正郎督通惠河道
于霖雨後經營修築商民交受其利尋視學山西絕
苞苴拔寒峻晉之士子作歌頌之後以

恩授奉政大夫卒祀鄉賢

王 俟字陶仲長山人康熙庚戌進士由湖廣興國知州陞雲南曲靖同知靖地苗蠻雜居不時為患俟單騎入山委曲開導苗民貼服人多以神明稱之舉卓異陞四川重慶知府

戴名振字奇珍汶上人康熙庚戌進士任浙江縉雲知縣惠蹟甚著行取除戶部主事未任卒人皆惜之盧道悅德州人性至孝孺慕之誠四十年如一日後

成康熙庚戌進士任河南偃師縣知縣秩滿致仕歸里二十餘年未嘗一履公庭年八十七歲卒祀鄉賢鹿廷瑄福山人康熙庚戌進士幼事親以孝聞母病癰親為吮舐任吳橋知縣奔父喪跣足行千餘里哀毀骨立訓誨兩弟俱成科甲睦族卹貧尤不倦初任吳橋即有道不拾遺夜不閉戶之政復宰平江獠蠻悉化又調承德縣縣為旗民雜處廷瑄殫心調置旗民兩安後卒于任歿時惟以國事為念一語不及于

私

張維賢嘉祥人以恩貢初任杭州府通判多惠政武林建祠祀之擢江寧府同知名註廉吏卒祀鄉賢

丁鏹諸城人幼聰慧有神童之稱長而博學能文屢躋場屋以明經終性慷慨好施予以是鄉里重之卒祀鄉賢

張貞字起元安邱人康熙壬子拔貢刻苦好學博覽羣書遨遊四方時與海內名流揚令權古一時稱

為文章巨手事母孝尤敦內行母以節著貞能克承
母志以光父業己未舉博學鴻詞以母喪不就乙丑
史館缺員以翰林待詔用亦不就退居杞城故園日
以著述為事年七十六卒祀鄉賢所著有杞田集等
書行世

劉方至掖縣人以恩貢授紹興府推官清介有守聽
斷明允署上虞縣事山寇陷城不屈死之

孫愈盛莘縣人由貢生任禹城縣訓導學識過人秉

性端方禹邑歲荒邑令隱匿不報愈盛泣請于上臺
乃申請賑濟饑民賴以全活禹人德之

藍深即墨人恩貢任江南臨淮知縣深有至性邑
令嘗舉其孝行其任臨淮時值海寇來犯京口距邑
僅三舍深練民兵為守禦計寇知有備乃遁又濬鍋
鐵口以通商賈民賴其利賦入不及額輒鬻產賠解
有大盜未獲監司掠治小盜令自誣服屬縣速斃之
以減口深不忍以人命悅上官卒拒之遂投劾去官

王勗陞萊陽人少孤以孝稱于鄉領康熙壬子鄉薦
後授岳陽知縣愛士卹民多善政尋司刑曹尤剛正
矢公矢慎以圖報効力疾赴任未幾卒祀鄉賢

高曰聰膠州人康熙癸丑進士以戶部郎中督學閩
中杜苞直絕請托凡所甄拔強半寒畯知名士而于
先賢後裔瑩墓祠宇尤所加意又置學田以贍貧士
事竣日入閩士子莫不攀轅相送焉卒祀鄉賢

范士瑾青城人康熙癸丑進士任廣東陽江縣知縣

性至孝事繼母一如所生卒祀鄉賢

張朝宋字采臣新城人少穎異與兄朝宗弟朝寵以文章齊名性凝重簡默事親至孝登康熙癸丑進士授河南偃師知縣時邑私徵甚繁民苦之朝宋下車悉與革除民困以甦公餘進諸生論文立科條教士文風乃振後以疾卒于官祀鄉賢

張文芳東阿人博學力行鄉黨稱其孝友嘗捐金以置學田後患瘋痺長子令儀斷一指和藥療之病遂

愈人謂其行善之報後少子令璜亦以進士官至少宰

趙瑋平原人幼孤事母以孝聞以明經授萊州府學訓導招集諸生立月課法拔其尤者廩給之一時文風蔚起又捐俸備樂器于學宮聘儒童肄習之歷三月而八音備生平篤學嗜古于諸書無不究悉所著有聖廟元音及典禮儀禮二卷藏于家

黃繼祖嘉祥人性磊落行端方讀書日千言尤研精

經濟學由貢生知湖廣常寧縣常邑徭民雜處素號
難治繼祖察民隱決疑獄置學田修文廟惠政卓卓
有神君慈母之頌尋以過勞致疾乞歸不獲竟所學
識者咸為惋惜云

高啓元萊陽人初授昌樂教諭陞安陽縣令性至孝
每曲承親志雖一花一石之微必力求而婉致之親
歿葬祭皆必誠必敬自甘淡泊宦囊所有悉以奉于
長兄不復問出入先官教諭去家五百餘里萊陽值

寇凡戚族被焚掠者皆招來冷署與共衣食不足且稱貸以繼令安陽歸益篤鄉黨而家教肅穆尤可法四世一堂甲科鵲起啓元訓之愈嚴臨歿之夕精神不亂人謂其得於理學者深也公舉祀于鄉賢

鄭之文臨清人康熙間任浙江台巡道中軍守備十三年耿逆煽禍於閩浙沿海多內應台城守馬信執署道傳夢顓之丈救護不克而死

黃文年堂邑人以恩蔭教習考授湖廣鄱縣知縣前

任有報墾荒應徵賦千餘金事屬子虛將攤派為民
害文年區畫詳達竟獲豁免會夏包子猖獗文年嚴
設守衛以計殲渠魁地方以安鄴俗生女大半溺死
質當子女過期不贖入為奴婢文年到任俱力禁之
及致仕歸民攀轅遮道七日始得出境卒祀鄉賢

李 濤字紫瀾德州人康熙乙卯解元丙辰進士由
庶常出守臨江以賢能著聲擢浙江鹽運使恤竈裕
商會

皇上巡幸浙江

特書惠愛二字以

賜之尋晉粵西藩伯以內艱歸服闋仍補任粵西凡興舉庶政皆得始終裕如以太常卿內召累官刑部右侍郎致政歸里卒

孟泰商河人由武進士初授山西孟壽營守備歷湖廣永定營都司康熙二十七年夏包子為逆委泰為先鋒戰於金口臨陣當先中砲而死敘贈進一階

李應鷹日照人浮梁知縣簠之子由康熙丙辰進士累官內閣學士禮部侍郎克承父志增廣義田以贍族里之貧者凡婚喪皆有定式蓋畧倣范文正云

蘇俊字用章武城人康熙丙辰進士初授中書舍人考選兵科給事正色立朝不畏權要致仕回籍閉門不與戶外事為鄉閭表率卒祀鄉賢

李華之字秀實諸城人康熙丙辰進士由中書歷任觀察粵東時瓊州峒獠猖獗華之單騎往諭獠衆釋

戈更為布置營伍使兵獮相安海南至今帖然香山
灣門海寇竊發奉檄往勦不兩月而平督撫交薦晉
湖北按察使時黃州守與黃梅令互訐閉城罷市有
以暮夜金獻者華之斥絕之卒白令寃丁內艱起補
黔中值三江苗變華之親按撫定尋陞雲南布政使
絕苞苴禁行稅滇人立生祠祀之累官至刑部侍郎
趙之隨字和千長山人康熙丙辰進士授四川石泉
知縣時邑當兵燹之餘戶口逃亡之隨力請于上官

清其冊籍民得樂業退食之暇為諸生講解經藝校正文體士由是知學奉部咨取授戶部主事旋陞員外歷官至雲南學政祀鄉賢

史長昆樂陵人康熙丙辰進士性孝友誠篤學復淹雅鄉黨素重之尋授直隸贊皇縣令安集流民鎮撫土寇以至興學校平徭賦革陋規毀淫祠善政不勝枚舉贊邑碑誌頗詳致仕歸卒舉祀於鄉

王揖膠州人樂善好施族黨咸推重之由明經通

判山西大同府革除積弊威惠大行尋遷陝西乾州知州所在有聲卒祀鄉賢

郭鴻嘉字渭孺單縣人弱冠讀近思錄慨然志于聖賢母歿遂不復就試潛心理學十餘年豁然貫通凡執經問難者常履滿戶外訓誨曾不少倦子愚已魁甲子東省鄉薦猶諄諄提命曰吾望若為聖賢不望若徒富貴也

張石麟堂邑人由貢生任陝西鳳縣知縣邑當孔道

民苦供億石麟設法辦給不匱不擾卒祀鄉賢

畢世持字公權淄川人讀書過目成誦幼有神童之
譽自童子試以至康熙戊午省元皆未嘗出第二人
文章傳誦海內綽有先正遺矩後以父歿哀毀成疾
卒人共惜之

田 需德州人康熙己未進士翰林院編修甲子典
試河南矢公矢慎事竣因病乞歸所著有潞河集涉
江集士服堂集側塾錄諸書卒祀鄉賢

潘應賓濟寧人康熙己未進士任翰林檢討分校禮
闈稱得士與學者談理必析入毫芒其所著作皆見
重於時處家庭事父及繼母極孝馭下極寬性尤耽
恬澹故自侍從告歸惟以山水樹藝為樂歿後公舉
入祠

房 嵩字申公東阿人至性純孝撫異母弟嵎備極
友愛康熙己未成進士以母命析箸嵩與嵎不立文
字每屏人私語子弟僮僕輩窺之蓋不忍析而相泣

也官中書舍人癸酉典試河南所拔多寒畯知名士
以疾卒於開封官舍

趙作舟海陽縣人康熙己未進士選庶常典試黔中
甄拔時稱藻鑑歷刑曹兢兢民命疏理冤抑甚多後
僉憲楚中益勤慎供職老成諳練消患未萌沅湘間
陰受其福前後歷六任皆清要歸時囊橐蕭然無忝
清白性嗜讀書旁通方畧辛丑于賊逼大嵩衛時作
舟家居出錢穀為戍兵饋餉與守土者共謀固圉凡

六閱月危城得安皆其力也歿後請祀

李澄中字漁村諸城人工詩文遠近學者宗之由博學鴻詞至翰林院侍讀典試滇南秉公持正所得皆一時名彥及致仕歸里清白自守足跡不入公門遇有事關國計民生即侃侃而談一以興利除害為念著有滇南集行日記卧象山詩集艮齋文選諸書行世卒祀鄉賢

郭文亮汶上人稚齡事父能孝父歿後始補弟子員

以舌耕自給後稍贏餘尤好賙卹黨族又嘗作三字箴以垂家訓邑人多矜式之

王者臣東平州人州庠生性孝友行醇篤而好學嗜古鍵戶搜討履跡不及城市設義學於王村之東安村之西凡閭黨貧家子弟之秀者悉令就學家非素豐而樂施予有以窘乏告者悉滿所願以去真人所難能者卒祀鄉賢

孔尚錦曲阜世職知縣幼孤事母至孝每病必親嘗

湯藥病不愈不敢入寢居官睦族必先念及鄉里故人服其公而惠

潘鵬雲樂陵人康熙壬戌進士歷官至直隸知府所至皆著賢聲致仕歸以忠信坦白待人尤厚於族給族弟田宅為族姪完姻官順德時為族兄治喪歸櫬一一盡禮人甚難之素性和平恂謹邑中忽有欲磨許忠節碑石為他用者則不惜直言力止碑賴永存歿公舉以祀

趙泰姓膠州人康熙壬戌進士初除浙江金華縣尋擢
湖州府同知居官有治績表彰先賢何王金許正學淵
源書並鄭愍忠文集湮沒數百年重刊以廣其傳至如
修呂成公祠堂復文定公書院建滋蘭書院設四鄉
義學作養人材振興文教皆其善政之卓卓可紀者
潘沂樂陵人由拔貢仕至福建建寧知府潔已率
屬屢著循卓以母老告歸力敦孝友性樂獎掖後進
延師督課族弟十八人皆成名又構小園于邑西北

具備飲饌燈火資招集遠邇名流會文講業因之成就者甚衆歿後祀于鄉賢

徐鳴珮單縣人以拔貢授江南鹽城知縣兩月而邑大治丁母艱服闋補廣東信宜縣後又調補江南婺源縣發為朱子故鄉有紫陽綱目書板為兵燹殘失鳴珮捐貲補刊又為朱子裔孫名坤者請襲博士尋陞山西保德知州以病乞休

孔尚鉞聖裔康熙甲子舉人任陝西岐山知縣勤于

撫字以清廉著聞歸來宦橐蕭然而敦篤孝友事孀母處昆弟藹如也鄉評重之

王沛懌諸城人康熙甲子舉人王為邑巨姓族不下數千丁四十三年邑大饑沛懌倡紳衿認賑之法各量力自賑其親族鄰里佃戶等請以官賑之米減價平糶人不知為歉年仕福建漳州同知上官重其才事無大小必咨詢而後定值海氛既靖時議欲裁水師兵漳城提督駐劄之所闔營惶惑幾不測沛懌曰

無輕議裁也老弱者汰之彼將奚辭缺伍不補不三年而事定矣督提竟從其議歷任至廣西布政使五十八年閭邑中稍旱亟遺書命其子出家粟千石以助賑糶雍正八年邑又大水沛檀方致仕家居仍倣行四十三年之法同里亦無不願者前後賑濟災荒惟諸邑無不給之慮沛檀之力也

劉 榮字弢子諸城人戶部員外郎必顯次子康熙乙丑進士初授長沙令嚴禁棄女惡俗全活甚夥值

有裁兵訛言城內兵譟上官莫措祭數陳大義開倉
借糧示必無裁意乃定擢寧羌牧修棧道立坊肆延
師講學教民蠶織法後人呼為劉公紬甲申擢平陽
守悉革陋規水蘄自持尋陞天津道仕終四川布政
使卒于官

汪 灝字文漪臨清人康熙乙丑進士授庶常游至
講讀出督山西學政絕苞苴謝請託清操勁節遠邇
著聞值

聖祖仁皇帝西巡知其清儉進內閣學士兼禮部侍郎

命兼陝西學政蓋從來未有之遇也差竣巡撫河南中州
吏治為之改觀會丁亥秋黃流暴漲灝親督河工晝
夜巡閱以此積勞成疾己丑冬告病歸里未幾卒所
著有倚雲閣詩集

張 璽鄒平人康熙乙丑進士任河南新野知縣民
素梗頑璽至任力除豪滑以懲刁風俗漸淳厚民甚
德之

魏 琰陽穀人性沉毅嗜學不倦康熙丁卯膺順天鄉薦官內閣中書舍人以親老乞歸

顏光數字學山曲阜復聖裔康熙戊辰進士由翰林出典浙江鄉試得知人譽即授提督學政清操卓識超絕前後浙人至今猶尸祝之兄光猷癸丑進士光敏丁未進士皆歷官中外有聲明河間知府印紹孫也

李斯義字質君長山人康熙戊辰進士由庶常擢御

史在臺中八年振綱飭紀輦轂肅清然秉小心持大體未嘗以搏擊示丰采歷遷福建巡撫潔已率屬勸農督餉清圉罔鉏奸猾毀淫祠禁溺女建育嬰堂修共學書院二年之內種種興除具有成效惜所施未竟以勞瘁卒于官

李本涵海陽縣人兵部侍郎贊元子康熙戊辰進士天性孝友事繼母色養二十年無少間兄弟姊妹十人共處十餘年未嘗有疾言遽色值萊陽歲饑出

錢穀以賑全活萬餘人衛城傾圯捐金以倡雉堞復
完蓋性樂施予如此歿之日實家無長物也卒舉祀
鄉賢

趙裕長山人由庠生仕至郎中賦性醇厚篤于孝
友好急公赴義卒祀鄉賢

石曰琮字宗玉長山人康熙辛未進士授河南新鄭
知縣邑當滇黔楚粵之衝供億旁午琮釐奸剔蠹積
弊一清中州漕米題歸改折舊例發帑采買途遠費

繁民苦轉運因自賞帑金豫糴于小灘水次里民便之遷寧羗知州尋陞平涼知府卒于官

李振璣字正桓金鄉人康熙辛未進士初任新河再任贛縣又移宰江南五河縣所治皆有循聲而五河為最邑苦旱瘠加以淮汎偶漲秋禾輒被水振璣屢為請賑請蠲不遺餘力亦不以頻仍為嫌民甚感之後歸里卒

張世琰鉅野人康熙丙子舉於鄉性孝友年十二居

祖喪即能盡喪盡禮宛如成人家貧每自噉粗糲而甘旨奉親無少缺與胞弟世城同居三十年了無間言而疾則親藥餌卒則具喪葬蓋備極親愛焉卒祀鄉賢

袁雲蒸長山人性孝友好行其德老而不倦里閭待以舉火者常數十家康熙丙子舉鄉飲大賓卒

謝琰福山人嗜讀書重立品生平以孝友敦厚重于戚黨教子家法尤極嚴慎以此二子諸孫俱成科

甲其子孫亦凜遵家訓不失清白聲卒祀鄉賢

吳汝亮字仲闇霑化人壬午舉人授江南江寧令時
邑漕一石常費至數石由里胥而上皆取盈於漕汝
亮既至並條糧耗羨悉去之時會城頻火動燼數百
家跡之得火者與火具詣審則旗廨也竟置諸法以
疾卒於官所著有徒水釣草半紫樓稿藏於家

李泰字陽復單縣人性純孝十七歲失怙恃哀毀
骨立因推愛其姊及甥飲食衣服以及僮僕田產皆

與已共且折授之尤樂善好施歲饑捐錢粟數千金
存活無算仲子樹目登進士為內閣中書泰躬逢

贈典人以為孝友之報

馬翀漢鄒平人由貢生任雲南羅次知縣性孝友築
華萼樓率諸弟攻苦皆使成立以已產益庶母弟人
稱其賢

張令儀東阿人事親孝父文芳患瘋痺醫藥不効令
儀乃斷一指和藥以進病漸瘳事聞建孝子坊於門

外

路允修字萬備汶上人由恩貢授江南常州通判尋陞淮安同知絕苞苴勤聽斷留心民莫凡興除不遺餘力兩郡民甚感之

路允釐汶上人淮安同知允修之弟天性純孝好善樂施時汶境土寇猖獗皆相戒勿犯路善人家允釐性朴素惟耽書史後耄年醫學尤精貧病者資以參苓不少倦年八十有二卒鄉人為之請祀

李斯佺字松客長山人由難蔭初任江南高淳知縣
邑四面環水斯佺修築巨堰民賴以安陞四川茂州
知州地界苗蠻數出焚掠斯佺恩威並用諸蠻相率
請降尋知雲南大理府滇地民承屯賦十倍民糧民
素苦之斯佺請以軍丁視民例起科民咸悅之丁母
憂服闋補福建寧府旋陞鹽運使卒於官

孟其人陽穀人端方諒直雅好讀書手業一卷蓋寒
暑無間也所著有蓼莪咏詩鳴集行世

馮源諸城人由貢生授曲阜縣訓導生而穎異端方不苟以理學自任卒祀鄉賢

王文焰膠州人性孝友好讀書由選貢初任宛平縣縣丞尋擢江南松江府通判潔已愛民所至有績郡人有神明之頌卒於家

李初妍寧海州人由歲貢任青城訓導竭誠教育捐俸買田以贍士之貧者致仕歸因寧海有代賠文登錢糧一項久為閭州之累初妍挺身力辦遂得清除

孔衍洪聖裔以恩貢任江南武進令勸農興學均徭

減耗歲小饑自出米煮粥以賑居鄉樂施婚喪資其力者甚衆卒祀鄉賢

杜履端海豐人拔貢生初授陝西綏德知州值旱蝗立為殲捕仍授法屬縣務期捕滅且捐俸賑粥申請免糧合州賴以全活陞正定府同知案無留牘丕振文風益著勤慎旋以疾致仕卒祀鄉賢

朱綱字子驄歷城人浙閩總督弘祚子自幼從父
宦遊四方講求經世之學以例貢初授兵部主事數
歷中外所至有聲由豫臬楚藩雍正初年授以滇撫
凡所條奏皆稱

上意調撫福建感懷父績益自刻厲以疾卒於官謚曰
勤恪其弟絳亦以部郎游至粵藩同時皆以幹濟稱
何世璠字澹菴新城人少負節氣端方自處不肯隨
世諧俗康熙己丑成進士官檢討處翰苑十餘年無

失言失色雍正元年出典江西鄉試隨視學兩浙未
期年改兩淮鹽運使弊絕風清商民胥悅尋巡撫貴
州招撫獠蠻生苗歸化者萬餘人陞刑部額外侍郎
又以吏部右侍郎總督直隸察吏安民事事實心行
政不辭勞瘁不避嫌怨年六十四卒於官諡曰端簡
孔毓珣字東美至聖裔由恩貢累官廣西按察使晉
四川布政以廉幹為舉朝所交薦隨巡撫廣西核實
常平積穀雍正元年以兵部尚書總督兩廣請撥粵

西倉穀分貯粵東以備賑糶議建各營倉儲倣常平
例春借秋還兵民皆受其賜七年總督河道殫心規
畫不避勞瘁以疾卒於官諡曰溫僖

袁景芳字蘭馥長山人內行純篤以孝友著聞由歲
貢授中書潛歷部郎出守廣西柳州府尋調思恩軍
民府時興隆土苗仇殺多年景芳至剿撫咸宜獠洞
懾服治南有河闊二十餘丈山水暴漲舟行多覆溺
景芳捐貲建長橋以便行李旋陞陝西平慶道慶陽

固原連年荒旱景芳設法賑濟吏無中飽民需實惠
值丁外艱臺憲留之不可得服闋仍以副使効力軍
前凡一切軍需事無貽誤勞勩成疾告歸歲庚戌邑
中大水比戶艱食景芳興役寓賑里黨藉以存活者
無算後子承紉亦以例貢知柳州府先後媲美時人
比之鄭文昭云

閔福玉安邱人由行伍初授浙江昌國營守備歷黃
巖鎮標左營遊擊訓練士卒奮勇當先康熙五十一

年巡哨至牛頭門遇賊相持盡日中飛砲而死

賜祭塋贈副總兵廕一子以守備用

滕國祥蓬萊人由行伍出身累陞登州水師遊擊信
賞必罰性極耿介體恤兵卒不啻父之于子以故其
下皆樂為用號稱銳師每出哨望見賊艘必併力以
赴賊多畏遁居民甚賴之康熙五十一年遇賊于鷄
鳴島為賊藥鎗中傷胸臂仍帶創殺賊數十人氣盡
乃仆贈驃騎將軍賜塋廕一子

兄共爨七十餘年性樂獎掖後學鄉之英俊藉其課訓以成名者甚多至康熙五十四年壽登百有一歲建坊旌表又三年卒公舉入鄉賢祠

梁心始嘉祥人縣學生事親孝嘗居哀過禮服至五年墓必百拜人或非之心始曰吾自盡吾心非為人也先王之禮吾雖過之不猶愈於不及者乎五世一堂年登百有一歲康熙六十一年建坊旌表

賽枝大文登人雍正初為雲南

缺

令烏蒙苗叛掠

缺

城枝大死之

魏嘉祚曲阜人事親甚孝同時有鉅野縣民李肅亦
以孝聞俱雍正六年旌表

崔仁益都人親喪廬墓終身不改雍正十二年旌
表按雍正六年以前旌表過廬墓孝子歷城邢起
龍懷世昌長山段彥桂徐萬言齊河馬朝才臨邑賀
倫寧陽張文月司進選單縣蔣台鼎鄆城刁鴻舉臨

胸張嘉賓諸城趙清棲霞楊守節楊守祿蔣應恒掖
縣李捌新泰王節武定州今改惠民縣曹大成陽信
齊煥然樂陵鄭四知蒲臺王天福濮州祁三奇以上
皆廬墓孝子也現在飭遵核實咨請留祀今備志之
以昭不匱云

李黃裳歷城人親病割股和藥以進病遂愈 按康
熙二十五年以後旌表過割股孝子歷城錢士賢淄
川沈潤德平馬廷佐鄒縣杜嘉徵冠縣顧良劉思臣

丁聖任臨朐張則久安邱任如春孫五郭培諸城張顯成姜豹文登董光燦陽信周以孚朱鵬日照張賓李翹出王顯是皆割股救親之孝子雖不合於典常而皆蒙

特恩旌表坊碑可據又似無可庸其釐剔者也今備志之

按山左承洙泗源流修魯齊禮讓人物之盛至道同歸元明以前曷乎尚矣我

國家培養恩深百年教育嶽靈川媚人傑物華而茲集
所採不過二百五十人其舊志所載者存而不刊事
因乎前善善欲長也至各州縣志中所錄與鄉賢祀
典所仍者宜乎無所區別於其間然而

功令煌煌慎加簡核自雍正四年以至十三年凡陸續
咨部留祀者方可入志外則

賜卹

賜諡經

廟堂之定議增簡冊之餘光其他雖稗野所傳鄉人所

好皆不敢廣收博攬以貽來世之口實也至有已經

入祠

雍正三年定例以前

而尚未咨部及已經咨部而尚未覆

准者八十一人其事跡雖有可稽而不敢遽為論斷

以俟後之作者所謂歷久而彌彰者也濟南一十五

人

章邱胡世藻斗天宿郝奇璋焦日培淄川高珩新城王士禔齊河徐升之齊東張惟養張夢蛟張翼

飛濟陽周新邦父馥臨邑邢王佐長清于茂元董國瓚

兗郡一十六人

滋陽孫元振曲

阜黃道寧陳懷真顏伯珖顏伯璟魏肯構毛千霄鄒縣潘重選魚臺劉澄濟寧熊士偉汶上岳崇功路衍

淳路衍祐嘉祥馮康東郡二人恩縣李珪武青郡九

世陽穀劉琰孟長人博興路登雲李敬修高苑張紹齡壽光魏瑄

人桑鳳蛟張濟世諸城李鼎梅馮世鞏王鉞登郡

一十三人文登劉輝呂瑋呂琨元和畢多馨于可均

陽趙景星榮萊郡一十二人掖縣王信璧王堦濰縣

成戚崇進昌邑黃在中膠州王柱今高密王颺沂郡四人蒙陰

昌即墨藍再茂孫兆禧周效周日燦李彥

儒日照厲瞻李泰安一人東平呂曹郡九人單縣劉

永禧安大觀樹日城武祝喻鉅野郭萬侯鄆城李長則東省所祀

慶李光陸張洞宸魏希徵范縣孫光祚之鄉賢其昭然在人耳目間者約畧如此夫櫛尼防

之秀色雖草木亦有餘香瞻泰岱之雄風即培塿盡
皆引領既已列於几筵誰復念其鼎足然而喬梓竝
茂不嫌父食之先華萼聯芳竟似兄終之及以陳常
之

令典夷為竊越之私恩珥筆徬徨怒焉如擣矣要之松
柏自有本性瑾瑜不匿奇光好惡泯而是非自著公
論定而直道斯存大道之行三代之英也其人其文
尚慎旃哉

山東通志卷二十八之四